

**Nakorsat namminersortut nunatsinni aallartitsinnaangornissaat anguniarlugu Naalackersuisut inatsisiliornissamik peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Doris J. Jensen, Siumut)

**Akissuteqaat**

(Peqqissutsimut Naalackersuisoq)

**Siullermeerneqarnera**

Inatsisartuni ilaasortaq Siumumeersup Doris J. Jensenip siunnersuutaanut Naalackersuisut qujapput.

Nunatsinni peqqinnissaqarfimmuut inatsisaareersut naapertorlugit nakorsatut namminersortut aallartissinnaaneq ingerlatsisinnaanerlu periarfissaareerpoq. Peqqinnissamut tunngatillugu sullissinerit annikitsut massakut Nuummi namminersortunit neqeroorutigineqartareerput soorlu namminersortunik kigutilerisoqarlunilu tagiartuisartoqarpoq allanillu peqqinnissamut tunngasunik annikitsunik sullissisoqartarluni.

Peqqinnissamut tunngasunik namminersortut ingerlatsilerneq soorlu nakorsatut assigiinngitsutigut pisinnaavoq. Pisortat peqqinnissaqarfimmik ingerlatsisuusut suleqatiginagit suleqatigalugilluunniit ingerlanneqarsinnaalluni. Namminersortut nakorsatut sullissineq tunngaviumik nammineerluni ingerlasinnaavoq. Taamaakkaluortoq nakorsap iliuserisinnaasai killeqassapput.

Nakorsatut namminersortut ingerlatsissagaanni nakorsatut sulineq pillugu inatsisip Kalaallit Nunaanni atortuulersinnissaa pillugu peqqussummi erseqqissaatigineqartut naapertorlugit nakorsaq nakorsatut namminersortut ingerlatsisinnaanissaminut piginnaatitsissummik peqartariaqarpoq. Tamatuma saniatigut nakorsaatinik nunatsinnut eqqussinissamut akuersissummik nakorsaq qinnuteqartariaqassaaq. Nakorsatut namminersortut nunatsinni ingerlatsisoqaleraluarpat nakorsap namminersortup peqqinnissamik ingerlatsinnera Nunatta Nakorsaaneqarfianit nakkutigineqassaaq.

Siuliani saqqummiunneqartut tunngavigalugit Naalackersuisut nalileereerlutik isumaqarput nunatsinni nakorsatut namminersortut ingerlatsinissami inatsisitigut tunngavissat amigaataangitsut. Amigaateqartut tasaanerorpasippu qulaajaanissaa aammalu namminersortup pisortallu peqqinnissaqarfimmik ingerlatsisuusut akornanni suleqatigiittoqarnissaa pillugu tunngaviumik isummernissaaq.

Tassa imaappoq nakorsap namminersortup Peqqinnissaqarfiup iniutaanik, atortuinik sulisuinullu atuisinnaanissaanut atugassarititassat tunngaviumik aalajangiiffigisariaqarput. Namminersortut ingerlatsisup assersuutigalugu qinnguartaartissimanerit misissornissaanut laboratoriamiluunniit misissuinerit peqqinnissaqarfimmi periarfissaareersunik atuisinnaanerit apeqqut tunngassuteqarneruvoq, taamaasiortoqarsinnaassappallu qanoq akiliuteqartoqartassanersoq. Napparsimasut Peqqinnissaqarfimmut nangillutik suliaritissinnaanissaanut innersuussisarnissanut periarfissat atugassarititassallu paasiniarneqaaqartariaqarputtaaq. Tamatuma saniatigut assersuutigalugu laboratoriani misissuisitsisarnerit, seqersinnerit inernerit misissuisitsisarnerit imalluunniit Nunatta Nakorsaataasivia aqutugalugu nakorsaatisanik aallertarnerit eqqarsaatigalugit nakorsat namminersortup Peqqinnissaqarfiup qarasaasiaanik atuisinnaanissaanut periarfissat qulaajarneqartariaqarput.

Peqqinnissamut tunngatillugu isumaqatigiisummi peqqinnissamut tunngatillugu aaqiissutissanik eqaatsunik misissuisoqarnissaa isumaqatigiisutigineqarsimavoq. Nunatsinni peqqinnissaqarfiup sullissinerani namminersortut annertunerusumik atorneqarsinnaaneri tamatuma kingunerisaanik misissorlugit aallartinneqareerput. Tamatuma peqatigisaanik peqqinnissamut tunngatillugu namminersortut atonerunerisigut iluaqtissat ajoqutaasinnaassullu misissoqqissaarneqarlutillu nalilersoqqissaarneqassapput. Uani Nuummi maanilu nunami illoqarfinni allani assigiinngissutaasut nassuerutigissagipput pingaaruteqarpoq. Nakorsatut namminersortutut ingerlatsinissamut illoqarfinnut allanut sanilliullugu Nuummi innuttaasut tunngavigineqartut pitsaaneruseqarfiup periarfissiipput. Taamaammat peqqinnissakkut sullissinermut periarfissaqarnermi naligiinnginnermik annerulersitsisumik assingusumik aaqiissuussinnginnissaq eqqumaffigissavarput. Suliaq nassuiaatit suliamik inerneqartinneqassaaq, nassuiaallu peqqinnissaqarfiup peqqinnissamullu suliaasani namminersortut atorneqartarsinnaanissaanut aammalu qanoq annertutigisumik atorneqartassaneri pillugit naalakkersuinikkut isummernissani atorneqassaaq.

Namminersortut peqqinnissamut tunngasunik suliaqarsinnaanerat inatsisit atuuttut naapertorlugit periarfissaarenera kiisalu qulaajaanermik suliaq aallartinneqarenera innersuusutigalugit, Naalakkersuisut allannguutissatut siunnersuummik imatut saqqummiussipput.

*“Nakorsatut namminersortutut ingerlatsineq annertunerusumik taperserniarlugu siammarterniarlugulu periarfissat paasiniarlugit kingusinnerpaamik UPA2025-mi tunniunneqartussamik qulaajaanermik Naalakkersuisut peqquneqarnissaannik Inatsisartut aalajangiiffissaattut siunnersuut. Qulaajaaneq pisortat peqqinnissaqarfiat nakorsallu namminersortutut ingerlataqartut akornanni suleqatigiiffiusinnaasunik aningaasaqarnikkut allaffissornikkullu tunngavissat pillugit naalakkersuinikkut isummernissamut tunngavissiissaaq.”*